

Latihan Karangan Perbahasan

Sempena Minggu Bahasa di sekolah, anda terpilih mewakili kelas dalam pertandingan bahas tentang usul “Peranan Ibu Bapa Lebih Penting dalam Pembentukan Disiplin Murid.” Anda bertindak sebagai wakil pihak kerajaan.

Tulis teks perbahasan tersebut selengkapny.

Panjangnya karangan anda hendaklah antara 350-500 patah perkataan.

Lengkapkan karangan anda dengan ayat-ayat yang sesuai. (*Drag and Drop*)

Dalam konteks ini, insan yang paling banyak menabur budi terhadap anak-anak ialah ibu bapa. Oleh itu, mereka mampu mendatangkan impak yang besar dalam proses mendisiplinkan anak-anak.

Bagi murid yang teringin untuk melakukan kesalahan disiplin akan berfikir beberapa kali kerana perbuatannya akan diketahui oleh ibu bapa dalam tempoh yang singkat. Hal inilah yang membuktikan bahawa ibu bapa lebih berperanan dalam usaha membentuk disiplin murid.

Anak-anak akan sentiasa dibawa ke masjid untuk solat berjemaah. Ibu bapa sering juga membawa anak-anak menyaksikan pameran berkaitan dengan bahaya penyalahgunaan dadah dan ponteng sekolah. Kegiatan sebegini mampu menyedarkan anak-anak dan membentuk disiplin diri mereka.

Pada pendapat saya, usul yang dikemukakan pada hari ini amat tepat kerana anak-anak ibarat kain putih, ibu bapalah yang akan mencorakkannya. Berdasarkan kata-kata tersebut saya menyokong usul yang dibahaskan, iaitu “Peranan Ibu Bapa Lebih Penting dalam Pembentukan Disiplin Murid”.

Selamat sejahtera saya ucapkan kepada Tuan Speaker, barisan kerajaan, barisan pembangkang, seterusnya, sidang dewan yang saya hormati. Usul yang akan diperdebatkan pada hari ini ialah ibu bapa lebih penting dalam pembentukan disiplin murid. (a) _____

Yang terhormat sekalian,

Dalam konteks usul pada hari ini, peranan bermaksud tugas yang dijalankan oleh seseorang. Ibu bapa merupakan ketua keluarga. Perkataan “penting” bermaksud memainkan peranan paling dominan. “Disiplin” pula bermaksud kepatuhan pada peraturan yang ada. “Murid” ialah

seseorang yang masih belajar di bangku sekolah. Kesimpulan usul ialah ibu bapa lebih dominan dalam usaha mendisiplinkan murid jika dibandingkan dengan elemen-elemen lain.

Insan yang paling rapat dengan anak-anak ialah ibu bapa. Sekiranya anak-anak melakukan kesilapan seperti ponteng sekolah, tidak membuat kerja rumah, atau kurang beradab, ibu bapa akan menegur anak mereka dengan penuh kasih sayang. (b) _____

Tuan-tuan dan puan-puan sekalian,

Ibu bapa hari ini mempunyai ilmu keibubapaan dan mereka sentiasa membentuk perwatakan yang baik agar dapat menjadi contoh teladan kepada anak-anak. Banyak sumber yang membolehkan ibu bapa membentuk keperibadian yang mulia supaya anak-anak dapat menjadikan mereka sebagai suri teladan dalam kehidupan. Ibu bapa hari ini bukan lagi seperti kebanyakan ibu bapa suatu ketika dahulu yang kurang mengendahkan disiplin anak-anak.

Ibu bapa bukan setakat berfungsi bagi menyediakan wang ringgit, makan minum, dan keperluan persekolahan sahaja. Sebenarnya, ibu bapa sentiasa membimbing anak-anak menjadi modal insan yang cemerlang dan terbilang. Ibu bapa membimbing anak-anak dari sudut sahsiah.

(c) _____

Ibu bapa sentiasa juga memberikan kerjasama kepada pihak sekolah. Apabila ibu bapa mempunyai hubungan yang erat dengan pihak sekolah, anak-anak akan lebih menyayangi sekolahnya. Guru-guru dapat berhubung dengan ibu bapa pada bila-bila masa sahaja apabila mereka mempunyai hubungan yang amat rapat. (d) _____

Saudara-saudari yang saya hormati,

Dengan hujah-hujah yang telah saya berikan, jelaslah bahawa ibu bapa merupakan insan terpenting dalam kehidupan manusia. Anak-anak mempunyai masa yang panjang bersama-sama dengan ibu bapa. Dengan hal yang demikian, sekali lagi saya tegaskan bahawa tiada sesiapa yang mampu menandingi kehebatan ibu bapa dalam proses mendidik dan membentuk disiplin anak-anak atau murid. Sekian, saya mohon usul ini disokong tanpa bantahan. Terima kasih.